



Kompas Spiritual



Guia Informativo basa riba formashon Spiritual pa miembronan di Scouting Antiano

Edishon 14
Mart 2016

Ningun hende por ta mas mihó si e no kere den Dios i obedesé su leinan. Pues tur Scout mester tin un religion -BP-

Den e edishon aki:

- 1 Introdukshon.
- 1 Imunidat.
- 1 Prueba ta nesesario pa yuda nos krese



Den fe.

- 2 Tradukshon di manual di W.O.S.M (desaroyo spiritual).

- 3 Indulgensia Plenaria..

Athunto:

- 🍀 Aktividat Spiritual: Frakaso ta humano.

Introdukshon

Imunidat

Den tratamentu medisinal IMUNIDAT ta masha esensial. Si kurpa humano ta imun pa sierto remedi anto e remedi no ta surgi efekto. Algun aña atras, a bin resultá ku kakalakanan a bira imun pa un sierto marka di insektisida, esei a sosodé na momentu ku un kantidat limitá di e insektonan aki, ku a wòrdu trata ku e marka di insektisida aki a sobreviví i esnan ku a nase despues tabata totalmente resistente. E venenu aki ya no tabatin efekto riba e generashon nobo di kakalaka, ku a haña un sistema di defenza ku por a 'handle' bon ku e insektisida.

Ta parse manera hopi hende tin un defenza kontra di e PALABRA di Dios. Fo'i ora nan tende algu di Dios òf e nòmber di Dios, ta komo sifuera nan ta bira resistente, defensivo i tin biaha te asta ofensivo.

Na un sierto momentu te asta nan ta bira furioso kontra e PALABRA di Dios. Si un hende no ta habri pa akseptá e bèrdad, anto ta e mes ta stroba e PALABRA (ku ta bibu i poderoso) trese bida den dje. Dios no ta obligá niun hende; ta un desishon personal i boluntario, pa nos tur pèrmití e

PALABRA hasi su trabou den nos kurason, den nos mente, den nos papia i den nos anda.

Ku introdukshon aki lo sirbi komo kuminda pa pensamentu pa boso mi rumannan.

Prueba ta nesesario pa yuda nos krese den fe

Un dia mi a disidí di entrega. Mi a laga mi trabou, mi relashon i mi fe. Mi a disidí asta di laga bida bai. Mi a bai riba un kaminda pa tene un último kombersashon ku Dios.


'Dios' ,mi a bisa.'Bo por duna mi djis un motibu, pa kiko mi no mester entrega tur e kosnan aki?' Su kontesta a sorprendé mi.

'Wak rònt di bo. Bo ta mira e varen i e bambu einan?' 'Si, mi ta mira nan' mi a kontesta. 'Awèl bon, dia mi a sembra e varen i e bambu, mi a sòru hopi bon pa nan. Mi no a pèrmití pa nan falta ni awa ni lus. E varen a krese lihé. Su blachinan bèrdè tabata tapa solo. Sinembargo di e simia di e bambu nada no a bini afó. Apesar di esei e bambu no a entrega. Den e dos aña e varen a krese mas el a bira mas diki i su kolo a habri. Pero atrobe nada no tabata sosodé ku e simia di e bambu. Pero mi no a laga e bambu bai. Den e di tres i di kuater aña tabata mesun kansion. Pero den e di sinku aña, diripiente un spreit chikitu a pusha sali for di tera bin ariba. Na promé bista e tabata hopi chikitu, nada kompará ku e varen. ma seis luna despues e bambu a krese 15 meter haltu. El a dura sinku aña pa ankra su raisnan. E raisnan ei tabata fuerte i tabata sòru pa e mata haña e loke ta nesesario pa e sobreviví. 'Mi no ta laga niun di mi kreashon pasa dor di situashonnan ku nan no por superá. Bo sa ku den tur e tempu ku bo a lucha aki bo raisnan tabata kresiendo? Nunka mi no a bandoná e bambu. Nunka mi a laga abo na kaya. No kompará bo mes ku otronan. A krea e bambu ku un meta spesífiko i diferente for di varen, pero tur dos ta importante pa hasi mondi un lugá bunita. Bo tempu lo yega. Bo a krese hopi kaba!

**TRADUKSHON di manual di W.O.S.M.
"GUIDELINES ON SPIRITUAL AND RELIGIOUS DEVELOPMENT"**

Proseso di siña 1 desaroyo spiritual.

Scouts ta siña dor di hasi, dor di eksperensia (learning by doing). E proseso di siña den e kaso aki ta keda presentá den 4 fase, manera indiká den e siguiente skema.



Eksplorá

Aktivitatnan tin ophetivonan edukativo, un propósito, den e kaso aki balornan spiritual. Ora ta prepará un aktivitat lidernan mester para ketu na e pregunta "kiko nos ke pa e hóben eksperensia? Ki balor nan lo eksperensia ku ta yuda forma nan ser?"

Reflekshoná

Reflekshon riba lokual a eksperensia durante e aktivitat. Opservá bo propio manera di pensa i aktuá pa asina siña for di e aktivitat. Mester hasi esaki den lus di nos Promesa i Lei pa asina diskubrí i kompartí e nifikashon spiritual. Ser atento pa e señalnan.

Konektá

Krea idea i posibilidatnan nobo kon pa kambia nos pensamentu i kustumbenan.

Disidí.

Skohe un proseso di kambio. Nos lo hasi tal i tal pa kambia i pa tal i tal motibu.

Nos programa mester kontené espasio pa reflekshon spiritual na final di un aktivitat pa e Scoutnan reflekshoná riba e eksperensia i kompartí e aspekto spiritual di lokual nan a eksperensia durante e aktivitat.





“INDULGENSIA PLENARIA”

Papa Francisco a splika den su karta di 1 di Sèptèmber 2015 e diferente forma pa optené indulgensia durante e aña di hubileo aki, (Aña Santu di Miserikòrdia) sea na Roma, na kualke lugá, inkluso den prizòn.

Pa optené indulgensia mester kumpli ku tres kondishon general di Iglesia, ku ta:

1. Konfeshon serka un saserdote
2. Partisipá na Eukaristia i risibí Santa Komunion
3. Resa pa intenshonnan di Papa

I den e Aña Santu aki, tambe kumpli ku un di e siguiente forma:

- peregriná pa e Porta Santu, sea na Roma òf pa e porta den e misa dediká pa Obispu;
- einan resa e Kredo i hasi un orashon pa Papa Francisco i pa e intenshonnan ku Papa Francisco tin warda den su kurason, pa bienestar di Iglesia i pa mundu henter;
- praktiká un òf mas obra di miserikòrdia, sea korporeal òf spiritual òf ámbos;
- e enfermo i ansiano ku no por sali fo’i kas:
biba bo enfermedat i sufrimentu ku ta trese bo mas serka di Señor, risibí Santa Komunion i partisipá na Santa Misa pa medio di diferente medio di komunikashon, manera televishon, radio, internèt;
- e prizonero:
asistí na Eukaristia den e kapia di prizòn i kada bia bo pasa den e porta di bo sel di prizòn, imaginá bo ku bo ta pasa e Porta Santu i hasi orashon pa Papa.

Por optené indulgensia pa defuntu: resa pa e kara Miserikòrdioso di Tata liberá e defuntu di tur kulpa.

Laga e dushi mirada di e Mama di Miserikòrdia kompañá nos riba e kaminda pa re-deskubrí e alegria di e ternura, e miserikòrdia di Dios.



Papa Francisco.

FRAKASO TA HUMANO

Area di desaroyo
KARAKTER



DESKRIPSHON DI E AKTIVIDAT

E wèlpnan lo tende un kuenta tokante di frakaso. Despues nan mester partisipá na un aktividat pa demostrá ku nos tur tin fayó i nos tur ta siña for di nos fayonan.

OPHETIVONAN DI E AKTIVIDAT

1. Komprondé ku tur hende ta hasi fout.
2. Konosé algun fayó básiko di tur mucha.
3. Siña ku hasi fout ta parti di nos siñansa pa krese.

**LUGÁ
ESPASIO HABRÍ**

**DURASHON
15 MINÛT**

**PARTISIPANTENAN
TUR WÈLP**

E TA KONTRIBUÍ NA LOGRO DI E SIGUIENTE OPHETIVONAN EDUKATIVO

Wèlp 7-9

1. Mi ta rekonosé i aseptá mi fayonan.
2. Mi ta partisipá na aktividatnan ku ta yudami deskubrí kiko mi por hasi.

Wèlp 9-11

1. Mi ta aseptá mi defektonan i mi sa ku tin kos ku mi no por hasi ainda.
2. Mi ta duna importansha na e kosnan ku mi ta hasi bon

MATERIAL

Espasio sufisiente grandi pa e wega.

DESAROYO DI E AKTIVIDAT

Preparashon di aktividat

Pone tur mucha sinta di un manera ku nan tur por skucha bon kiko e lider ta konta. Nan mester ta kómodo sintá pa asina por sigui e kuenta.

Kuenta

Ora un hòMBER tabata pasa banda di algun olefante, diripiente el a para ketu i keda wak. Sorprendé i konfuso pa e echo ku e olefantenan, kende ta kriaturanan grandi i fuerte, tabata ser wantá ku un kabuya fini ku ta mará na nan pia. No tabatin kouchi ni kadena. Tabata opvio ku e olefantenan por a ranka bai na kualke momentu. Pero tòg nan no a hasi'è.

E hòMBER a aserká e trener di e olefantenan i puntr'è konbini e olefantenan tabata djis para einan i no purba ranka i bai.

E trener e orei a splika:
“Temporada ku e olefantenan tabata chikí, e kabuya fini ei mes por a wanta nan. Komo nan kurpa no tabatin hopi forza ainda, e kabuya tabata sufisiente fuerte. Segun nan a sigui krese, nan a keda kere ku e kabuya ta fuerte i ku nan no por sali. P'esei nan no ta purba ranka bai, maske ku nan lo por.”

E hòMBER a keda asombrá. E animalnan por a bai na kualke momentu, pero komo nan no tabata kere ku nan por, nan a keda mará. Meskos ku e olefantenan, kuantu di nos ta laga loke nos ta kere tene nos mará, djis paso nos a faya un biaha?

Moral

Frakaso ta parti di nos kresementu. Nos mester sa di perseverá, ni maske kuantu biaha nos frakasá. Bo ta faya no pasó bo mester a faya, sino paso tin un lès ku bo mester siña for di dje.

Wega di mímika

Segun nan haña turno, un wèlp ta bai serka e lider mientras e otro nan ta permanesé sintá. E wèlp ku bai serka e lider ta haña un palabra ku ta simbolisá e opstakulonan ku muchanan den e edat di wèlp ta konfrontá.

E wèlp mester aktua e akshon ku el a haña serka e lider (sin hasi niun sonido) mientras e otro wèlpnan mester rei kiko e akshon ta. Duna e muchanan 2 minüt pa rei e akshon.

Motivá e wèlp ku mester hasi e mímika i gui'è den ki akshon e por hasi.

Sigui asina te ora 15 minüt pasa òf nan rei tur e akshonnan.

Lista di mímika:

- Mara kabuya (feter)
- Tira bala
- Traha huiswerk
- Toka instrumènt
- Lesa
- Siña
- Wak televishon
- Hunga video games

Evaluashon di aktividat

Evaluá ku e muchanan kua ta e difikultatnan ku nan tin. Kua ta e kosnan ku nan sa faya mas den dje i kiko nan por hasi pa siña for di nan fayonan. Motivá nan ku fayo ta algu humano i ku nan mester perserverá i siña for di nan fayonan.